



Miércoles, 8 de xunetu del 2026

El Principáu concede 680.000 euros n'ayudes pal caltenimientu y divulgación del patrimoniu cultural asturianu

- La cuantía mayor, 350.000 euros, destínase a restaurar Bienes d'Interés Cultural (BIC) o incluyíos individualmente nel Inventariu del Patrimoniu Cultural d'Asturies (IPCA)
- Les resoluciones incluyen tamién subvenciones pa proyectos de divulgación del patrimoniu material y inmaterial, trabayos de caltenimientu y actuaciones arqueolóxiques
- De la mesma manera, destínase una partida a la meyora de los albergues de pelegrinos del Camín de Santiago

La Conseyería de Cultura, Política Llingüística y Deporte resolvió delles llinies d'ayudes del ámbitu del patrimoniu cultural por un importe global de 680.040 euros. Estes subvenciones, tramitaes en réxime de concurrencia competitiva, tienen como oxetivu reforciar el caltenimientu, restauración, investigación y divulgación del patrimoniu asturianu.

El mayor bloque correspuende a la convocatoria destinada a la restauración d'elementos que formen parte del patrimoniu cultural d'Asturies. Esta llinia, dotada con 350.000 euros, financia actuaciones promovíes por particulares y instituciones ensin afán d'arriquecimientu sobre Bienes d'Interés Cultural (BIC) o bienes incluyíos individualmente nel Inventariu del Patrimoniu Cultural d'Asturies (IPCA). Trátase d'una de les llinies centrales de la política de caltenimientu patrimonial, porque dexa actuar directamente sobre bienes protexíos que riquen intervenciones especializaes pa garantizar la so estabilidá, recuperación y preservación al llargu plazu.

Les ayudes concedíes garren un conxuntu ampliu de bienes muebles y inmuebles, con actuaciones n'arquitectura relixosa, civil y tradicional, amás de n'elementos artísticos y etnográficos. Ente los proyectos subvencionaos figuren intervenciones en retablos, imáxenes, ilesies, capiyes, palacios, horros, cubiertes tradicionales, muries históriques y otros elementos singulares repartíos per dellos conceyos asturianos. En concretu, van acometese, ente otres actuaciones, trabayos nel retablu de la ilesia de Llorío, en Llaviana; la Colexata de Salas, la ilesia de Soutu Lluiña, el Palaciu Valdés de Xixón, el Monesteriu de Valdediós, Santuyano, la ilesia de Santa María de Llugás, la capiya del Santu Cristu

Nota de prensa

de Xedré, la ilesia de San Martín de Sotrondio, horros d'Ibias, cubiertes de *teito* en Somiedu, l'edificiu de la Colonia Escolar de Salinas o dellos bienes patrimoniales de Cangas del Narcea.

Estes actuaciones van dexar recuperar valores orixinales de los bienes, favorecer el so caltenimientu y garantizar qu'esti patrimoniu pueda seguir formando parte de la vida cultural, social y territorial d'Asturies.

Sofitu pa divulgar el patrimoniu cultural asturianu

A esta llinia súmase la resolución de les subvenciones pa la divulgación, estudiu y fomentu del valor del patrimoniu cultural de la comunidá, con una cuantía total de 140.000 euros. Esta convocatoria nun se centra namás na intervención física sobre los bienes, sinón que lo fai tamién na so investigación, documentación, interpretación, divulgación y tresmisión social. El so oxetivu ye reforciar el conocimientu públicu del patrimoniu asturianu y sofitar proyectos que dexen averar a la ciudadanía dende ámbitos diversos, como la edición, la educación patrimonial, la dixitalización, los archivos, la memoria oral, les esposiciones, los recursos audiovisuales o les actividaes culturales.

Nel ámbitu del patrimoniu material, ente les iniciatives subvencionaes figuren propuestes rellacionaes cola arqueoloxía y el patrimoniu rural, l'estudiu del paisaxe históricu y la documentación de bienes patrimoniales, publicaciones especializaes, xornaes de patrimoniu industrial, proyectos vinculaos a la historia de la lloza de San Cloyo, la memoria social de parroquies, la cultura industrial, el patrimoniu monásticu, los faros d'Asturies, el patrimoniu indianu o la divulgación dixital de bienes muebles y inmuebles.

En cuanto al patrimoniu inmaterial, inclúyense iniciatives sobre escuela rural, memoria oral de la industria conservera, cultura sidrera, fondos sonoros de música tradicional, historia oral, tradición oral asturiana, archivos fotográficos, música contemporánea asturiana, saberes vinculaos a los *llagareros* caseros o memoria de los *llavaderos*.

Ayudes bienes d'interés históricu y actuaciones arqueolóxiques

La Conseyería tamién resolvió dos nueves llinies d'apoyu al patrimoniu cultural. D'una parte, destínense 100.000 euros a entidaes locales pa obres de caltenimientu, restauración o rehabilitación de bienes d'interés históricu, con actuaciones nel batán del conxuntu etnográficu d'Os Teixóis, en Taramundi; la Casa de Cultura-Palaciu d'Oumaña, en Cangas del Narcea; el castro As Croas d'Eilale, en San Tiso d'Abres; el llavaderu d'As Donas, en Tapia; la torre del reló y la maquinaria de la Casa Conceyu d'A Veiga, y les escueles d'Arangas, en Cabrales.

Otra manera, concédense 73.594,77 euros pa financiar proyectos y actuaciones arqueolóxiques sobre bienes del Patrimoniu Cultural

Nota de prensa

d'Asturies, con ayudes tanto pa persones físiques y xurídiques como pa centros y instituciones de xestión y investigación arqueolóxica. Les actuaciones inclúyen trabayos nel Castru Chao Samartín, en Grandas de Salime; la villa romana de La Estaca/Andayón, en Les Regueres; la muralla d'Avilés; el xacimientu de *Lucus Asturum*, en Llanera; la cueva de Hou Amieva, en Llanes; la braña de La Verbenosa y carboneres de La Roza, n'Ayande; la redolada del Camín Real de La Mesa; La Campa Torres, en Xixón; la cueva d' El Pozu'l Ramu, en Ribeseya, y el xacimientu d'El Pindal, en Ribadeva.

Ayudes a los albergues de pelegrinos

Al mesmu tiempu, nos últimos díes Cultura resolvió la llinia d'ayudes a entidaes locales pal caltenimientu y meyora d'albergues de pelegrinos del Camín de Santiago de titularidá o xestión municipal. Nesti casu, l'importe concedíu xube a 16.445,31 euros.

Les subvenciones benefician a actuaciones nos albergues de L'Escampleru, en Les Regueres; La Isla, en Colunga; Piñeira, en Navia; Ayande; El Franco; La Pola, en L.lena, y La Vega, en Sariegu. Esta llinia contribuye a ameyorar equipamientos vinculaos al Camín de Santiago y a reforciar l'atención a les persones pelegrines, al tiempu que se caltién una infraestructura asociada a ún de los grandes itinerarios culturales europeos.